

## Musā<sup>(a.s)</sup> Ne Qaanun Kī Kitaaboñ Ko Likh Kar Purā Kiyā

**Taurait : laadā 31:24-29**

Musā<sup>(a.s)</sup> ne Allaah ke qaanun kī kitaab<sup>[a]</sup> ko likh kar purā kiyā.<sup>(24)</sup> Tab unhone Laawī logoñ ko bulaayā aur hukm diyā. [Ye log Laawī q̄haandaan ke log the jo ahad ke sañduk<sup>[b]</sup> ko sambhaalte the.]<sup>(25)</sup> Musā<sup>(a.s)</sup> ne unse kahā, “Qaanun kī is kitaab ko ahad ke sañduk ke paas rakh do, jo Allaah rabbul azeem ke ahad kī nishaanī hai. Ye hameshā waheen rahnī chaahie taaki tum logoñ ke q̄hilaaf gawaahī<sup>[c]</sup> de sake.”<sup>(26)</sup> Maiñ jaantā huñ ki tum log kitne ziddī aur belagaam ho. Tum log mere zindā hote hue bhī Allaah taa’alā kā kahnā naheen maante, to mere marne ke baad tum log aur bhī zyaadā manmaanī karne lagoge.<sup>(27)</sup>

“Tum log apne q̄haandaan ke saare buḍhe logoñ ko aur rahanumaaon ko mere paas bulā kar laao. Maiñ un logoñ ko kuch baateñ bataanā chaahatā huñ taaki sab ise jaan sakeñ. Maiñ āsmaan aur zameen se kahuñgā ki wo iske gawaah baneñ.”<sup>(28)</sup> Maiñ jaantā huñ ki tum log mere marne ke baad aur bhī zyaadā gunaahgaar ban jaaoge. Tum log mere die hue hukm ke q̄hilaaf ho jaaoge. Āne waale waqt me tum logoñ ke saath bahut se haadse hoñge. Tum log wahī kaam karoge jisko Allaah taa’alā ne haraam kahā hai. Tum log but banaaoge jisse Allaah rabbul azeem naaraaz ho jaaegā.”<sup>(29)</sup>

---

[a] Taurait shareef ke pahale paañch hisse haiñ, jin ke naam “Q̄hilqat,” “Hijrat,” “Ālim-e-deen kā qaanun,” “Gintī,” aur “laadā” hote haiñ.

[b] Ahad ke sañduk me patthar kī wo donoñ sleṭeñ rakhī huñ theen jis par Allaah taalā ne das hukm likh kar die the.

[c] Musā<sup>(a.s)</sup> ne Taurait shareef kī pahalī paañch hissoñ ko purā kar diyā thā taaki koī ab ye nā kah sake ki wo ye qaanun naheen jaante aur agar phir bhī wo jhuṭ bolte to kitaab unke q̄hilaaf gawaahī detī.